

The Astrid Lindgren Memorial Award - Mirsad Bećirbašić kandidat za 2010. godinu iz BiH

The Astrid Lindgren Memorial Award - Mirsad Becirbasic Candidate for year 2010 from B&H

Merima Arslankadić, bibliotekar / Librarian

NUBBiH / NULB&H

Sarajevo, BiH

www.nub.ba

merimab@nub.ba

Nominator za Memorijalnu nagradu Astrid Lindgren iz Bosne i Hercegovine je Nacionalna i univerzitetska biblioteka BiH koja je ove godine predložila poznatog dječijeg pisca Mirsada Bećirbašića.

Nominating body from Bosnia and Herzegovina for the Astrid Lindgren Memorial Award is the National and University Library of Bosnia and Herzegovina. This year it has proposed well-known children writer Mirsad Bećirbašić as the candidate for the Award.

Memorijalna nagrada Astrid Lindgren - The Astrid Lindgren Memorial Award dodjeljuje se svake godine. Vrijednost nagrade je 530.000 eura, što predstavlja najveći iznos namijenjen međunarodnoj nagradi za djecu i mlade u svijetu. Cilj nagrade je pokazati da je čitanje jako važno za djecu i mlade. Nominirani mogu biti autori, ilustratori, pripovjedači priča.

Nagrada autorima se dodjeljuje za cjelokupno djelo, a ne samo za pojedine radove, što se odnosi i na ilustratore i pripovjedače priča. Nagrada može biti dodijeljena i osobama ili organizacijama koje rade na poticanju čitanja djece i mladih. Ovu prestižnu nagradu mogu primiti samo živi autori.

Ove godine je nominovano ukupno 167 kandidata iz 61 zemlje, od toga 79 su autori, 42 su ilustratori, 29 promotori čitanja (organizacije i pojedinačno) i 17 ih je nominovano iz redova pripovjedača priča.

Prijedlozi su pristigli od 103 nominirajuća tijela iz cijelog svijeta. Pobjednik ili pobjednici The Astrid Lindgren Memorial Award 2010. bit će objavljeni 24. marta u 13:00 sati u Vimmerby u Švedskoj, rodnom mjestu Astrid Lindgren. Obavijest će biti publikovana uživo na Dječijem sajmu knjiga u Bolonji i na web stranici www.alma.se.

Pobjednike bira iskusan žiri s odličnim poznavanjem dječije književnosti i književnosti za mlade, te pravima djece. Žiri je sastavljen od 12 članova, autora, književnih kritičara i učitelja, ilustratora i bibliotekara. Jedan član predstavlja porodicu spisateljice Astrid Lindgren. Kako bi uvećali globalni aspekt nagrade, svake godine žiri bira institucije i organizacije iz cijelog svijeta kako bi i oni imali priliku nominirati kandidate za ovu prestižnu nagradu. Ono što je ovim nominirajućim tijelima potrebno obezbijediti jeste dobar uvid i predodžba o predloženom autoru, ilustratoru, pripovjedaču ili promotoru čitanja iz njihovih zemalja ili jezičkih područja.

Pozivnice za nominaciju kandidata se šalju svake godine u januaru. Nominacije moraju biti poslane do 15. maja svake godine.

Dobitnik nagrade za 2009. godinu je Tamer Institute for Community Education, organizacija koja promovira čitanje, smještena u West Banku i Gazi, osnovana 1989. godine. Ovaj institut radi za Palestinu, gdje djeca i mladi ljudi mogu razviti svoje znanje i sposobnosti u sigurnom, demokratskom okruženju i tako ostvariti svoje snove. Vizija instituta je osigurati kvalitetno obrazovanje za sve, pristup informacijama, slobodu izražavanja i situaciju u kojoj djeca i mladi ljudi osjećaju da ih se cijeni i sluša. Njihov san je Palestina u kojoj se djeca i mladi mogu igrati, učiti i razvijati zajedno, dijeleći ideje i iskustva, te izražavajući se kroz pisanje, dijalog i umjetnost.

Institut djeluje tako što organizuje radionice za kreativan rad, čitanje priča i časove drame, poduzimajući kampanje čitanja, objavljivanje dječijih radova, organizaciju obuke za bibliotekare, te objavljuje novine s pričama djece, njihovim osvrtima i tekstovima.

Dječija literatura ima mogućnost da poveća razumijevanje i razmjenu kultura i ljudi. Pristup djece i mladih ljudi književnosti je preduslov za demokratiju i iskrenost. Nagrada je osmišljena u cilju jačanja dječijih prava na globalnom nivou, s posebnom pažnjom na što više prijevoda, što omogućava djeci pristup do visokokvalitetne književnosti.

„Mi živimo u različitim dijelovima svijeta, ali opet imamo mnogo toga zajedničkog. Velika prednost ove nagrade, koju država Švedska predstavlja svake godine, je to što je ovo nagrada za sve narode ovoga svijeta i za autore cijeloga svijeta. Kao rezultat imamo različitosti i također zajedništvo. Možemo se prepoznati u dobroj knjizi bilo gdje da se nalazimo“, riječi su Lene Adelson-Liljeroth, švedske ministrice za kulturu.

Kandidat za 2010. godinu ispred BiH je pisac dječije književnosti Mirsad Bećirbašić. On promovira čitanje kroz dijalog s djecom, čitajući im svoje radove i slušajući njihove kreativne radove i pjesme. Već godinama su njegova djela uključena u školsku lektiru. On potiče djecu da pišu i objavljuju svoje radove i da možda jednog dana, kada odrastu, i sami postanu veliki pisci.

Odan je djeci kao autor, teatrolog, tv-scenarist i pedagog. Njegova poezija promovira globalnu harmoniju, ljepotu, ljubav i život u kojem je svako svakome srodna duša.

Bio je nagrađivan mnogo puta, a posljednja nagrada je bila godišnja nagrada Udruženja pisaca BiH za dječiju književnost za knjigu „Ko prije do mene, dobi pjesme i priče od mene“.

